

47

NO. SOALAN: 23

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : DATO' SRI HASAN BIN MALEK**  
**[KUALA PILAH – BN UMNO]**

**TARIKH : 2 NOVEMBER 2017**

**NO. SOALAN : 23**

**Dato' Sri Hasan Bin Malek [Kuala Pilah]** minta **PERDANA MENTERI** menyatakan apakah langkah yang boleh diambil Kerajaan bagi membantu komuniti Rohingya Myanmar yang telah mendaftar dengan Suruhanjaya Tinggi Pertubuhan Bangsa-bangsa Bersatu Mengenai Pelarian (UNHCR) mendapatkan pekerjaan dalam sektor-sektor tertentu di negara ini bagi membolehkan mereka meneruskan kelangsungan hidup serta mengelakkan mereka dari terus terlibat dengan gejala tidak sihat.

**JAWAPAN:      YB. DATO' SERI DR. SHAHIDAN BIN KASSIM**  
**MENTERI DI JABATAN PERDANA MENTERI**

Tuan Yang Di-Pertua,

Dasar sedia ada negara yang tidak membenarkan “pelarian” termasuk etnik Rohingya, Myanmar bekerja masih lagi dikekalkan memandangkan semua migran asing yang ingin bekerja di negara ini perlu mempunyai dokumen perjalanan yang sah dan mematuhi semua undang-undang, peraturan dan dasar semasa berkaitan kebenaran migran asing bekerja di Malaysia.

Kad Suruhanjaya Tinggi Pertubuhan Bangsa-bangsa Bersatu Mengenai Pelarian (UNHCR) bukanlah merupakan suatu dokumen perjalanan yang sah.

Adalah menjadi tanggungjawab UNHCR yang memberikan status “pelarian” dan kad UNHCR untuk menjaga kebajikan “pelarian” termasuk kos sara hidup, kesihatan, pendidikan kepada “pelarian” yang mempunyai kad UNHCR yang sah yang dibenarkan tinggal sementara sehingga dihantar ke negara ketiga atau pulang ke negara asal.

Walau bagaimanapun, Jemaah Menteri yang bermesyuarat pada 2 Mac 2016 telah memutuskan supaya Kementerian Dalam Negeri melaksanakan Projek Perintis Kebenaran Bekerja Untuk Pemegang Kad UNHCR Etnik Rohingya.

Projek Perintis ini menyasarkan hanya 300 orang kumpulan kecil etnik Rohingya yang bekerja di bawah sektor perladangan dan perkilangan

sahaja bagi tempoh tiga (3) tahun. Projek ini dilihat memberi ruang kepada golongan pemegang kad UNHCR untuk menyara kehidupan melalui pekerjaan yang sah dan sekali gus dapat mengekang mereka daripada terlibat dengan aktiviti jenayah dan sosial.

Sekian, terima kasih.